

<sup>myr</sup>  
LETTRE <sup>no. 2</sup> DE  
CONSOLATION,  
A MONSEIGNEUR LE  
DVC DE NEVERS.

SVR LE TRESPAS DE  
*Madame la Duchesse de Nevers.*

Par le sieur de NERVEZE.

172.



A PARIS,

Chez PIERRE DES-HAYES, à l'Isle du  
Palais, devant le cheual de bronze.

M. DC. XVIII.

PRINTED BY

JOHN JOHNSON

ST. MARTIN'S LANE

W. 1831

BY

JOHN JOHNSON

ST. MARTIN'S LANE

1831



25

1831

JOHN JOHNSON

ST. MARTIN'S LANE



LETTRE DE  
**CONSOLATION.**  
A MONSEIGNEVR LE  
DVC DE NEVERS.

*SVR LE TRESPAS DE  
Madame la Duchesse de Nevers.*

**M**ONSEIGNEVR,

En vne perte qui touche le  
general & le particulier, il est  
bien difficile que les esprits puis-  
sent faire l'office de consolateurs, puis qu'un  
chacun a part à l'affliction publique, & que les  
raisons & les paroles de consolation manquēt  
ou les mouuemens de la douleur abondent: Il  
est vray qu'ayant ses degrez & sa mesure selon  
celle de l'interest de la perte, les moins interes-  
sez peuuent avec plus de liberté consoler les  
autres sur lesquels le dommage tombe tout  
entier; Et bien que ma douleur ne soit pas des  
moindres entre celles de vos seruiteurs, & que

difficilement elle me puisse permettre de concevoir des pensees propres à la consolation, si la fais- ie forcer en ce subiet à l'affection que j'ay à vostre seruice, & de ceux à qui le trespas de feu Madame la Duchesse de Nevers touche par loy de proximité, l'affliction desquels semble aller du pair avec la vostre, tant l'amour fraternel s'accorde au vostre coniugal, pour faire ensemble vn triste concert de soursirs & de regrets, & tesmoigner à la France que ceste perte est aussi dignement regrettee de ceux qui y ont le principal interest, que iustement regrettable à tout le monde, & particulièrement à ceux qui ont eu l'honneur d'estre cognus, & de cognoistre ceste Princesse. Je ne pretends point Monseigneur, d'arrester pour encor vos pleurs, bien que mon dessein soit de les appaiser, Je sçai que ceste seignee de l'ame est necessaire à vostre soulagement, & que l'industrie de l'art ne peut auoir si tost la force d'arrester le cours de la Nature, en vne occasion ou l'amour & la mort disposent de vostre cœur, & semblent estre les arbitres de vostre vie. Le prix & les merites de ceste chere espouse que vous auez perduë rendent vos ennuis si iustes, que la qualité de Prince genereux & magnanime ne retranche rien de l'honneur de vos armes, au contraire, elle donne plus de lustre à l'amitié, & fidelité d'un Espoux qui en



ceste perte, pense auoir tout perdu, & qui sou-  
haitteroit volontiers, comme, marty de future  
sa chere moitié, si comme pere, la cōsideration  
des enfans ne s'opposoit à ce desir, vostre a-  
mour commun le fait croire, & la violence  
de vostre affliction me le fait dire, sans que nul  
puisse en cela condamner ces extresmes res-  
sentimens, tant les vertus & les perfections de  
sa personne marquent la iustice de vos souf-  
pirs. Ainsi pardonnant à vostre douleur tout  
ce qu'elle opere en vostre esprit, nous ne l'ac-  
cuserons point de tyrannie, pourueu qu'elle se  
contente d'un delay raisonnable pour exercer  
sa puissance, & qu'apres le temps que la raison  
luy aura donné, elle face place à vostre pru-  
dence, & luy laisse la liberté de faire son office.  
Je ne vous representeray point ici la constāce  
de ces grands personnages de l'antiquité, qui  
ont receu d'un cœur ferme & resolu, la mort  
de leurs enfans, & de leurs Espouses, regardé  
leurs funerailles d'un œil sec, & porté à l'heure  
mesme un frōt & un esprit asseuré au service  
de la patrie, & de la chose publique: Il faudroit  
pour pratiquer la mesme constance auoir les  
mesmes mœurs de ces grands hōmes, dont la  
philosophie & l'amour d'une gloire tempo-  
relle rendoient leurs âmes plus austeres que  
les nostres, que la Religion nourrit à une plus  
grande tendresse, pour nous rendre plus hu-

maines enuers les viuans , & plus pieux enuers  
les morts : Le mesme Autheur qui nous lais-  
se ces exemples dit , que les larmes ne sont  
point mal seantes aux sages , pourueu qu'elles  
coulent avec moderation. Vostre iuste ressen-  
timent, Monseigneur, fait excuser l'excez des  
vostres, puis que vostre cœur est encore dans  
le naturel desreiglement des premiers mouue-  
mens: mais que vostre iugement se souuienne  
aussi de l'en tirer le plustost qu'il luy sera pos-  
sible, & d'arrester par cōsideratiō de sagesse , ce  
que vous souffrez par ressentimēt d'amour, &  
de raison: N'enfermez point dans vne afflictio  
domestique, quoy que grāde, & qui touche mē-  
me de regret les ames eltrangeres, ce courage  
genereux & amoureux de l'honneur, qui autre-  
fois vous a tiré loing de chez vous, & de vostre  
repos, & qui vous a tousiours sollicité d'aban-  
donner, & maison, & famille , pour aller cher-  
cher vne mort glorieuse dans vne guerre sain-  
te, & faire de vos trauaux, & de vostre sang vn  
prix d'honneur & de salut pour le nom , &  
pour l'ame. le croy bien que ce courage, & ce-  
ste pieuse ambition, se peuent trouuer main-  
tenant comme abbattus du coup de vostre in-  
fortune , & que toutes ces images de gloire  
qui se formoyent en vostre esprit , pour le ser-  
uice de Dieu, & de ses Autels, sont place à cel-  
les de vostre chere Espouse: desplorables quāt

à son trespas, mais venerables quant aux vertus de sa vie, qui seront à iamais viuantes en la memoire des mortels, comme vn ornement eternal, non seulement à la maison tres-illustre de Lorraine d'où ceste grande Princesse estoit sortie, à celle de Gonzague & de Neuers où elle estoit entrée: mais encore à la France, où elle nasquit, & fut esleuee. Sa grande pieté enuers Dieu, son amour & fidelité enuers vous, sa passion au biē public, son bō naturel enuers les siens, sa charité enuers les pāures, & sa prudence & sage conduite en toutes ses actions, sont des tiltres glorieux pour la faire croire bien-heureute dans le ciel, & faire à iamais honorer, & louer sa memoire dās le monde: Tiltres qui doyuent encore seruir à vostre consolation, vous representant aussi bien le bonheur de la possession d vne Princesse si parfaite, que le malheur de la perte, afin de rendre plustost graces à Dieu, du bien que vous auez possedé, que vous plaindre de ce qu'il vous l'a osté. Il l'a appellee lors qu'il luy a pleu, apres auoir beny & enrichy vostre couche d vn nōbre de beaux enfans pour l'appuy de vostre maison, & la consolation de vostre vie. A cela il n'y a rien à dire, & à murmurer contre sa prouidence, mais plustost à le louer, & à obeir à ses volontez, qui à la verité vous l'ont rauie en la fleur de son aage, au fort du besoin qu'el-



le faisoit à ses enfans, & à vous mesmes, mais toutes ces circonstances de malheur serviront à signaler & honorer d'auantage vostre obeissance enuers Dieu, & vostre patience enuers vous mesmes, comme ie supplie sa diuine bonté, de fauoriser en cela mes desirs & mes vœux, vous departant la consolation que vous souhaitez,

MONSEIGNEVR,

Vostre tres-humble & tres-  
obeyssant seruiteur,  
NERVEZE.